

ՔԱՂԱՔԱԿԱՆ ՏԵՍՈՒԹԻՒՆ

Գլադատոնի իրլանդական ինքնավարութեան օրինագիծը ընդունեց համայնքների ժողովում նաև երկրորդ ընթերցանութեամբ, ապրիլի 11-ին: Իսկ մինչև երրորդ ընթերցումը ընդդիմադիր պահպանողական կուսակցութիւնը գործ դրեց իւր բոլոր ոյժը ժողովրդի մէջ յուզումն առաջ բերելու, հետևապէս և օրինագիծը, երրորդ ընթերցանութեան միջոցին, տապալելու համար: Այդ նպատակով Բալֆուրը, պահպանողականների պարագլուխը համայնքների ժողովում, յետ չկանգնեց նոյն իսկ գրեթէ ապստամբական յորդորներից, ուղղած դէպի ժողովուրդը, մանաւանդ իւր պտույտների ժամանակ Իրլանդիայի Ուշլստէրի վիճակում, ուր, ինչպէս յայտնի է, ժողովուրդը անգլիական ու շոտլանդական է և ոչ իրլանդական: Բայց այդ բոլորը զուր աշխատանք եղաւ: Համայնքների ժողովը, անկասկած է, որ ընդունելու է իրլանդական բիլլը, որից յետոյ օրինագիծը պէտք է տանւի լորդերի ժողովը, ուր պահպանողական էլեմենտը անհամեմատ աւելի զօրեղ է: Բայց ամենից գլխաւորը այն է, որ օրինագիծը համայնքների ժողովում ընդունւի, որ արդէն դուրս է ամեն կասկածից:

Գերմանական զինուորական օրինագիծը ռայխստագում չընդունեց և ոչ իսկ այն փոփոխութիւններով, որոնցով կղերականների կուսակցութեան անդամ պատգամաւոր Գիւնէ'ն ուղեց օգնել կառավարութեանը: Թէ կանցյէր Վապրիւին և թէ կայսր Վիլհելմ II գործ դրեցին օրինագիծը ընդունել տալու համար իրանց ամբողջ հեղինակութիւնը, բայց իզուր: Ռայխստագի լուծումը սպասոււմ էր այդ դէպքում և իրօք, հէնց որ Գիւնէի առաջարկն էլ չըն-

դունւեց՝ կայսեր հրամանով ռաջխստագը լուծւեց: Նոր ընտրութիւնները նշանակւած են յունիսի 15-ին, նոր տոմարով:

Գերմանական կառավարութիւնը լիաջոյս է, որ ազգը կընտրի մի ռաջխստագ, որը կ'ընդունի զինւորական օրինադիժը: Մենք հաւատում ենք, որ ընտրութիւնների հետեանքը այդպէս կը լինի, այսինքն կը լինի յօգուտ կառավարութեան. բայց միևնույն ժամանակ պէտք ասենք, որ ազգի այդպիսի վարմունքի մէջ անգամ չպէտք է տեսնել մեծ հաւատ դէպի կառավարութիւնը, այլ թերեւ միայն ցանկութիւն՝ կառավարութեան պատիւը պահպանել և խոյս տալ մի կոնֆլիկտից, որի հետեանքները անհաշւելի կը լինեն:

Գերմանական այժմ արդէն լուծւած ռաջխստագի վարմունքը, սակայն, սթափեցուցի: Ներգործութիւն կ'ունենայ ամբողջ Եւրոպայի վրայ, իբր մի զօրեղ բողոք անվերջ սպառազինութեան դէմ:

Իտալիայի թագաւորական զոյգի ամուսնութեան 25-ամեակի առիթով, որ տօնւեց Հռոմում, թագակիրներից ներկայ էր գերմանական կայսերական զոյգը, որը Հռոմ գնաց արտակարգ փառահեղութեամբ: Նկատելու արժանի է այն, որ նաև այս մեծ դէպքում Աւստրիայի կայսրը չօգուեց առիթից անձամբ ներկայ լինելու Հռոմում: Գերմանական կայսեր այցելութիւնը նաև պապին չօգնեց սակայն որ ամբողջ կղերական կուսակցութիւնը ռաջխստագի գրաւի յօգուտ զինւորական օրինադիժի: